



U dobroj vjeri da ćemo doprinijeti provedbi Agende Ujedinjenih nacija 2030 – Ciljevi održivog razvoja (SDGs), a uzimajući u obzir slične napore poslovnih zajednica širom svijeta, posebno u Švedskoj, mi, dobitnici Nagrade za biznis lidere u održivom razvoju, prihvatamo izazov da ostvarimo Ciljeve održivog razvoja kroz konkretne i evidentne napore za dobrobit svih ljudi.

Deklaracija o održivom razvoju Ciljevi održivog razvoja i naše zajedničko opredjeljenje

Prvi put u historiji sačinjen je globalni plan održivog razvoja. Privatni sektor kao prirodni dio svakodnevnog života u svim našim društvima predstavlja temelj ovog razvojnog plana, pošto kompanije posjeduju veliki potencijal da preuzmu vodeću ulogu u transformaciji i usmjeravanju svijeta ka održivoj budućnosti.

Mi, članovi poslovne zajednice, obećavamo da će održivi razvoj postati sastavni dio našeg osnovnog poslovanja i poslovnih modela. Stoga se obavezujemo da ćemo:

- **Sistematski minimalizirati negativan uticaj na okolinu, maksimalizirati naš pozitivni doprinos i osmisliti veću efikasnost u načinu na koji koristimo resurse (u skladu sa SDG 12);**
 - Promocija efikasnijeg korištenja vode, smanjenje upotrebe štetnih hemikalija i povećanje udjela izvora obnovljive energije u našim lancima vrijednosti.
 - Težnja za smanjenjem proizvodnje otpada, a s ciljem stvaranja kružne ekonomije.
 - Povećanje otpornosti na uticaje klimatskih promjena i smanjenje upotrebe fosilnih goriva i drugih aktivnosti u proizvodnji stakleničkih gasova.
- **Osmisliti kvalitetna radna mjesta, produktivne poslove i razvojne mogućnosti za one koji rade za nas, za naše dobavljače i naše klijente u društvima u kojima djelujemo (u skladu sa SDG 8);**
 - Osiguravanje da se poštuju ljudska prava, uključujući radnička prava, kroz naše lance vrijednosti.
 - Jačanje socijalnog dijaloga i odnosa između strana na tržištu rada.
 - Doprinos razvoju vještina i izgradnji kapaciteta.
- **Boriti se protiv korupcije i neetičkih metoda poslovanja u zemljama u kojima poslujemo (u skladu sa SDG 16);**
 - Razmjena iskustava i najboljih praksi za smanjenje rizika od korupcije.
 - Podizanje ljestvice u našim internim antikorupcijskim i etičkim politikama.

Uz to, opredijeljeni smo, kroz sve naše aktivnosti, za promociju rodne ravnopravnosti i jednakih mogućnosti za sve kao neophodno potrebnih za sistemske promjene.

Svoju predanost održivom razvoju pokazujemo riječima i djelima. Za postizanje ovih ciljeva potrebno je hrabro vođstvo. Ovim podržavamo usvajanje Okvira za implementaciju Ciljeva održivog razvoja u Bosni i Hercegovini i pokretanje Savjeta za održivi razvoj koji će usmjeravati proces lokalizacije Ciljeva održivog razvoja u zemlji.

Da bismo ostvarili Ciljeve održivog razvoja, moramo uložiti dodatne napore i tražiti nova rješenja i partnerstva između privatnog sektora, javnog sektora, akademske zajednice i civilnog društva.

U vremenu koje dolazi inovacije će biti ključna pokretačka snaga. Informacioni i digitalni alati, kao i novi modeli finansijskih rješenja mogu olakšati prilike za poslovanje, održivost okoline i smanjenje siromaštva.

Pozivamo sada naše kolege i kolegice iz poslovne zajednice u Bosni i Hercegovini da slijede naš pristup i da održivi razvoj učine bitnim dijelom svojih osnovnih djelatnosti. Podstičemo vas da prihvatite izazov ostvarivanja Ciljeva održivog razvoja tako što ćete svoje napore učiniti opipljivim i vidljivim svim ljudima.

Sarajevo, 8. oktobra 2021. godine